

四庫全書

集部

欽定四庫全書

淨德集卷五

宋 呂陶 撰

奏狀

奏乞罷開樂宴狀

臣伏聞國朝故事祥禫既除有開樂一宴近來中外喧傳謂已擇日排辦日夕必行此禮臣愚竊疑之蓋自春徂夏早暵為災陛下憂勞恐懼避殿減膳精誠祈禱夙

夜不遑以至過自貶損權罷受冊務答天心以異亨嘉之應此乃曠古未有之德天下幸甚今群臣屢拜封章乞從禮聽樂陛下報詔未蒙允許乃未有開晏之期而中外相傳皆謂晏在旦夕似於事體未便伏祈宣諭有司一就坤成節賜宴則於禮文亦非簡疎內可以隆二聖慈孝之德外可以稱上帝眷佑之意

貼黃

臣又聞英宗朝八月將宴後苑劉庠言去日食近非

畏天之意特為罷之神宗朝四月將宴富弼以災異為言亦蒙嘉納今早暵之沴雖已消弭而天道尤宜欽畏願陛下無災而懼為德天下幸甚

奏乞蠲放開封諸縣熙寧中殘欠常平錢狀

臣訪聞開封府諸縣人戶自熙寧五六年後累欠常平錢等至今凡十二三料經涉十六七年計所出息已過鉅萬緣逐處貧下之家見今猶有殘欠官中不住督歛或父祖已亡勒子孫填還或無戶可催責干繫人代納

或經災傷委實貧乏多者不滿千錢少者終過一二百而追呼監靠動有騷擾昨來雖蒙降赦指揮分作六料逐歲送納仁恤之意極為寬厚然歲月深遠無可催理者終是有此疾苦未沾聖澤臣愚伏謂王治之體惠中國以綏四方德教之流先京師而後諸夏畿內之民尤宜安養諸路所欠多自隨料次催納無如府界累經倚閣積累十餘年猶有少欠伏望聖慈特賞指揮府界諸縣自熙寧五年後有人戶殘欠常平現累子孫填還或

干繫人代納及昨經災傷第四等以下等現欠者並與  
蠲放庶使德惠實及困窮

貼黃

赦文雖許展限年月送納諸縣未免將積欠之數分  
作六料催理數目雖不多而煩擾甚衆莫若特賜蠲  
免

又

昨赦文市易錢二百貫以下並得除放今來殘欠青

苗錢多者每戶不滿百貫累歲倚閣莫非貧乏之家却將催納重輕之理顯見未均如蒙揀察特與除放則惠澤實及農民方當新陳未接之際早賜指揮極為厚幸

辭免居起舍人狀

右臣準閣門告除臣起居舍人伏以柱下之官記人主言動脩一代典章傳信後世惟博學多聞習知史法之士可稱其職如臣衰陋材不足用安敢冒據以速罪戾

仰祈睿明慎惜名器特寢誤恩庶允公論所有告命未  
敢祇受

奏乞罷郭茂恂工部郎中狀

臣去年三月中曾彈奏郭茂恂前任陝西監牧日枷禁  
無罪婦人阿黨等令賠錢雇女使及在秦州永興軍皆  
有不檢之罪醜聲流播道路喧聞不可為省郎并相度  
監牧蒙朝廷採納臣言罷茂恂庫部郎中更不遣經畫  
牧地仍除軍器少監當時士大夫謂朝廷既知茂恂猥



惡如此而尚不許補外者蓋執政以親舊之愛曲為庇  
護姑且處之京局俟人言稍息必復進用今日果如所  
料乃以茂恂任工部郎中詔命既傳頗駭群聽且進善  
退惡者天下之公議信賞必罰者人主之大權貪廉既  
稟於天資安有昔汙而今潔陞黜動關於國體豈可前  
是而後非倘從輔弼之主張必誤朝廷之任使伏願陛  
下深明本末洞察公私特罷恩除庶清郎選

貼黃

况茂恂領軍器監以來仍更違法冒請製造神御帳  
興工下手節料了畢等錢貪猥之行久而不革臣已  
嘗彈奏伏請論罪如律豈可因其有過又復遷官

奏乞進擢奉議郎杜敏求狀

臣嘗被旨遠使詢察官吏之能否得善不薦有愧於心  
臣伏見奉議郎監成都府商稅杜敏求治身知義為學  
知本從政知體良材嘉器可用於朝恭惟陛下虛心求  
賢尤善任使如敏求者伏請進擢以觀報效

奏舉任伯雨充學官狀

臣先准朝旨舉內外學官二人臣已奉詔舉果州團練  
推官知成都府新都縣李由頤充學官其人雖蒙朝旨  
差充河中府教授原不曾赴任已差充鄜延路經畧司  
勾當公事訖臣後來別未曾舉官今伏見前施州清江  
縣主簿任伯雨素有文行今保舉充學官任使

貼黃

臣伏見兵部侍郎趙彥若昨奏舉周純充重法地分

知縣其周純為少得闕次情願不就近趙彥若再舉  
溫俊民充重法地分知縣已蒙吏部施行有此體例

伏祈照會

奏乞察小人邪妄之言狀

臣察謂人君深居九重尊高如天雖有聖智亦未能周  
知天下之事必以納諫為先既能納諫則臣子可盡下  
情以陳治亂之要今陛下聽政之初臣備位侍從朝廷  
之事得以論思敢竭愚鄙少報萬分之一願陛下特加

省覽伏以太皇太后保佑聖躬於今九年垂簾聽政天下治安一旦棄四海之養凡在臣庶痛心泣血無所逮及方其得疾之初陛下憂形玉色躬侍藥食衣不解帶告於天地社稷禱於宗廟山川薄刑赦罪釋逋輕賦凡可以祈福禳災之事講求備至及其疾勢大漸則召高族子弟入於禁中丁寧撫慰有安心免憂之言既以大殮內侍有需索酒食者禮部臣僚謂方當哀毀不可為閭閻鄙俚之事恐累聖德陛下即從批奏遂罷其請繼

有手詔稱揚太皇太后臨朝累年抑損外戚未嘗假借  
無以報稱盛德議於高族子弟推恩又慮諸處應奉山  
陵過有勞費遂令降詔有司並須遵依遺詔指揮遠近  
臣子聞此等事無不感歎皆謂太皇太后於陛下有天  
地之功於社稷有萬世之力陛下深知本末尊而報之  
一言一事不敢違戾太皇太后之德上合天心足以享  
萬壽下副人望足以保四海宗社幸甚天下幸甚然臣  
於此時以無可疑而為疑以不必言而為言則其罪不

勝誅矣所恃者陛下之仁好諫明而察物必能納臣私  
憂過計之罪爾蓋自太皇太后垂簾以來屏黜凶邪裁  
抑僥倖橫恩濫賞一切革去小人之心不無怨憾萬一  
或有奸邪不正之言上惑聖聽謂太皇太后斥革舊臣  
更改政事今日陛下既親萬幾則某人宜復用某事宜  
復行此乃治亂之端安危之機君子小人消長之兆在  
陛下察與不察也辨與不辨也陛下察其是非辨其邪  
正使非不敢勝是邪不能害正則君子進小人退天下

治而安矣昔元祐之初臣任臺官嘗因奏事簾前恭聞德音宣諭云朝廷政事若果于民有害即當更改其他不繫利害者亦不須改每改一事必說與太后恐外人不知臣深思此語則太皇太后凡有更改固非出于私意蓋不得已而後改也至如章惇悖慢無禮呂惠卿姦回害物蔡確謗毀大不敬李定不持母喪張誡一盜父墓中物宋用臣掎斂過當李憲王中正邀功生邊事皆事積惡盈罪不容誅若敗露於先帝之朝必須不免竄



逐若暴揚於陛下之手亦合正以典刑以此而言則太  
皇太后所改之事皆欲生民之便所逐之臣盡是天下  
之惡豈可以為非乎恭惟陛下聰明聖智出於天縱是  
非邪正進退可否必已了然於心豈待人言而後辨臣  
乃不避斧鉞之譴喋喋以告陛下者亦嫠婦不恤緯而  
憂宗周之意也夫嫠婦以組織為事惟經緯是恤今乃  
不恤其緯而以周亡為憂固可怪矣愚者千慮亦有一  
得狂夫之言明主擇焉臣又聞昔者明肅太后稱制之

日多以私恩偏及親黨聽斷庶物或涉過差及至仁宗  
皇帝親政之初臣下遂有希合上意言其闕失仁宗察  
見情偽降詔止絕其畧曰明肅太后夙承先顧保佑冲  
人勤約之風化流四海或號令之所出或聽斷之從宜  
蓋機務之實繁雖旰昃而無暇賞善罰惡惟命令之已  
行革故鼎新非孝思之所至易月方臨於庶政虛懷觀  
納於讜言其有關識遠圖靡循理體達於聞聽姑務矜  
容多形瑣碎之言復有迎合之意宜申誠勵以警姦回

應明肅太后垂簾日所行詔命已經施行過諸般公事  
輒不得更有上言於是天下之人皆謂仁宗深念社稷  
之功能金子母之愛聖德廣大超越今古載在史冊垂  
範後世陛下所宜法而行之臣愚竊謂明肅太后之政  
時有過闕仁宗念其保護尚降詔書不容小人輒有議  
論而况太皇太后垂簾九年所行之政皆已便民所逐  
之臣各已當罪無可擬議萬一小人狂妄獻言豈可容  
哉豈可信哉願陛下明示黜罰杜塞其端以副天下之

望以隆宗社之福

乞別給致仕狀

右臣任受上件差遣於建中靖國元年正月十七日到任為年及七十五歲齒髮衰暮竊慮職事曠廢尋於建中靖國元年二月十二日據梓州進奏官鄭永通狀申稱正月二十六日遞到臣陳乞致仕奏狀於當日投進訖二十七日計會收取到許本官依前集賢殿修撰致仕敕於二十七日申時發達字號入馬遞前去臣契勘

上件致仕救命馬遞條限日行三百里梓州至京三千  
六百里計程合在二月初十日遞到梓州今來已經五  
十日尚未見到緣都進奏院自正月二十八日以後至  
二月二十五日發來馬遞皮角計十七件並已先次到  
州惟是臣致仕敕牒未到臣屢差人自本州以去至鳳  
翔府沿路根究前件今正月二十七日達字號遞角委  
是未見轉送前來竊慮在路沉失念臣衰病累年勉強  
不行方具奏聞陳乞致仕已蒙聖恩俞允許臣守本官

致仕出給敕命兼已蒙聖恩官朝奉大夫李仲知梓州  
填現闕本官現已取索接人非久到任臣尚未受到致  
仕敕命離任未得伏望聖慈檢會臣前奏狀別降致仕  
敕命付臣照會以憑離任

劄子

辭免殿中侍御史劄子

臣今月二十一日準尚書省劄子奉聖旨除殿中侍御  
史者聞命震悸不知所為竊以副端之與丞雖雖輕重

不倫而任責畧等非材識兼茂望臨一時何以稱選矧  
時多艱厥任尤重如臣樸陋之學豈能有行衰遲之蹤  
無所可用賜還舊列曾未踰時無補秋毫方圖丐罷遽  
蒙擢序大懼無以仰副睿明耳目之寄欲望聖慈追寢  
新命

上殿劄子

臣昨準朝旨往成都路計度轉運司諭以更改差役大  
意同共定議見得本路人戶貧富等第高下不均蓋諸

縣大半以稅錢多少立為戶等有自一貫至於十貫以上或自五貫至五十貫以上並為第一等若各差一役皆三二年一替則富者常幸貧者常不幸又緣中等人戶緣少除官戶單丁女戶寺觀外一縣之役有差一兩番不足處况役人數目已依熙寧後來裁定難更減省今來若不頻差上戶則無以寬中下之家須相度立法其戶多處以十二年戶少處以九年為率分作三次總計合役之數均勻定差謂如有一貫稅錢於九年或十



二年中合差役一次則二貫以上者差兩次逐次各一人三貫以上者差三次逐次各一人其稅錢轉多則又增所差之役於九年或十二年之內三次差役共不過

五六人

原註謂逐次各差兩人即非併差五六人也

仍令私自僱人祇應其

一貫以下等第漸低只差縣役一年又其次者差戶長或渡子半年所有第四等往往更不應役第五等別並不差充大約如此風俗以為稍平外餘衙前皆悉招募以坊場錢酬支重難及出賣坊場只據現今第四界直

令管押綱運了當人指占承買更不實封投狀並在本路役帳畫一開說差官齎赴闕訖伏乞降臣此奏付詳定役法所照會候本路文字到日相度可否施行

貼黃

臣又聞近降朝旨出等戶更不差役只令減半出免錢則諸縣合役之戶轉少須至差上等人戶兼一兩役所貴少寬中下之家

又上殿劄子

臣奉使遠方察知民間疾苦及官政未安凡一十事已  
嘗呈奏其一乞減瀘州兵戍不示賊以形且省饋運之  
勞其二乞不築雅州城以節橫費免於遠方生事其三  
乞立科折條約使轉運司與州縣同任其責以戒重歛  
其四乞添和買布價以寬民力其五乞減成都稅院小  
料綾綺罷監官免勾百姓助工按此下有脫文其七乞興州濟  
衆監鑄減輕錢庶使疲民不為鑪冶所困其八乞詳審  
改正蔡濛所減鐵價并所奪人鐵鑪其九乞開卓筒鹽

井以濟困窮賴其課入可助本路之用其十乞罷興州  
青陽鎮銅錫場監官以減冗濫凡此十者或陳一道之  
利害或指一郡之休戚或議一邑或言一國以朝廷視  
之乃細瑣毫末不足上禫國論以遠方望之則皆切近  
人情最為急務仰惟聖治願賜採納

奉使至河北劄子

臣將命出疆與聞使事既見遼人往還之際事體小有  
未便不敢隱默今具大概以浼天聽臣不勝惶懼待罪

之至臣經由河北州軍訪聞近有朝旨為據坤成節接  
伴所相度裁減人使經過處冗占兵士數目過多將來  
祇應恐有闕事官更多以為憂只如邢州一千二百三  
人其他州郡若以邢州為率例皆裁減深恐臨時誤闕  
臣竊謂朝廷懷接遼人恩禮優厚務存國體必不計較  
毫末之費自來遼人經過州郡雖有冗占人兵一則是  
州縣上下務要供應了畢不令闕事二則是小人群集  
希覬數日酒食積習成弊勢雖盡革令若便依坤成節

接伴所定到人數施行臣恐未能盡去僥倖之弊却有  
供應闕誤之失蓋異域之人既至中國不可繩以文法  
或沿路收買物色行李重大所差之人津般不足未免  
須要添差人兵或道塗雨雪泥潦大寒後兵逃走死亡  
折傷疾病別無餘剩人數應急補填亦致留滯以此逐  
處須至各差準備人兵亦未為過當伏望聖慈特降指  
揮下河北路州軍於舊例差兵士應副遼人往來數內  
十分量減二分所貴不至闕誤生事

貼黃

臣又聞昨來坤成節遼人北歸沿路為雨水所阻每車一乘差四五十人牛驢二三十頭方牽拽得行以此推之豈可過減人兵緣今來賀興龍節人使相次入界伏乞早降指揮

奉使契丹回上殿劄子

臣竊見河朔州郡密接北疆過雄州三十里便為境界然地勢平坦絕無險阻控扼去處雖州郡修完城壘訓

練兵屯以備緩急然萬一有烽燧之警終是易為衛把  
惟塘水一事極可禦寇蓋自淳化中知雄州何承矩相  
度地形衆流所會開為塘泊上自順安軍至雄州莫州  
霸州保定信安乾安軍及滄州凡八州軍地分東西長  
六百餘里南北濶至二十餘里狹亦七八里周回二千  
餘里深亦有數丈處沿隄各置寨鋪守把比之據高設  
險則用力最省為備最大謂宜常切開廣愛護易令小  
有侵損壅塞乃邊防之要務也自近年以來許人於高



仰水不到處種蒔漸次冒佃官中因而打量界至立定租課其逐處所取已及四五十餘頃每歲所入止有三千四百五十餘石寢慮歲月寢久侵佃漸多於邊防之計頗為闕失雖北人通好多年務守盟約百事恭順然敵情難測不可一日不講其備伏望聖明特降睿旨下河北安撫轉運屯田司密切指揮應係塘泊今後不得更令人戶以高仰為名妄有指射侵占如所出租課稍重許令退佃以廣塘水之利庶幾邊防不致誤闕

又奉使契丹回上殿劄子

臣奉使過燕京見數回紇立於道傍指郝惟立而言却是郝使來蓋惟立嘗押伴拂菻諸蠻所以有識認者又過中京見數回紇臣問蕭爽回紇來此是進奉或是買賣爽云回紇有數州屬本朝常來進奉亦非時常來買賣臣竊思之回紇既有數州隸屬北界常至彼處貢奉不缺則往來之迹不踈一日見中國使人便能識認若為北人所遣令至本朝以進奉為名探問事意或與北

人混雜而至同為姦偽或有小人因緣為姦別致漏露  
安可不防緣回紇至本朝雖差押伴臣僚其關防出入  
及買賣諸物切慮法禁未至周備臣愚伏望特降指揮  
別立條約密加檢察

淨德集卷五

欽定四庫全書

淨德集卷六

宋 呂陶 撰

表

辭免殿中侍御史表

原註元祐元年閏三月

官有其責實繫紀綱材非所長徒累名器方睿明之善  
繼惟聽納之處先宜任忠純以司獻替如臣者生而孤  
遠學則迂踈不通治道之本原安能論政未熟朝廷之

典故何以繩愆願回拔擢之恩慎委端良之士庶使言能適用官不備員聖君有得於謀猷愚者獲安於守分所有告命未敢祇受

辭免左司諫表

原註元祐二年六月

官以序遷人非實稱况七臣之所貴豈一介之可勝敢瀝愚表願還寵命伏念臣學未能造道材不足適時向自郎曹擢用言路徒更歲月何補涓埃立伏在廷尚緩黜幽之典伏蒲獻說愈懷竊位之羞匪惟清議之莫容

抑恐孤忠之易墮仰祈睿鑒特寢誤恩所有告命未敢  
祇受

進郊祀禮成詩表

臣聞承天莫重于郊蓋求端而報本惟聖為能享帝務  
薦德以交神共慶昌期儻熙能事恭惟皇帝陛下道該  
元化運席重熙勤色養于三宮動遵慈訓格歡心於萬  
國肇舉嚴禋參求今古之宜倣用祖宗之憲具陳百禮  
並報兩儀丕承穰簡之休大布生成之澤湯仁解網周

俗虛囿遠之侯甸要荒盡驅躋於壽域小則蟲魚草木亦茂遂於恩波臣叨侍清光親逢盛觀聽圉丘降神之樂均有虔誠續昊天成命之歌愧無善頌謹吟成郊祀禮成詩一首三十韻奉表投進以聞

謝梓州路轉運副使表

臣伏奉告命差權梓州路計度轉運副使兼本路勸農使臣已於今月二十五日到任者京右輸將轉引嫌而願避坤維刺舉復申命以違行壘被靈寵徒知感懼伏

念臣寒鄉寡與素守自明偶待罪于中臺旋充員于左  
省爨火不能助太陽之精勺水無以益滄海之深每竭  
慮以上聞多蒙開納及叨恩而外補盡出保全此蓋太  
皇太后陛下垂計寶圖玩心治道優容言職以隆聽諫  
之美名慎重使權欲廣愛民之盛德因而孤蹇預此光  
華况巴蜀之數州去朝廷而百舍土居險陋俗尚孱迷  
雖平時賦入之饒經常粗給自頃歲軍興之後瘡痍未  
完網密則人用咎咨轡柔則事將廢弛臣敢不講求中



術推尊至仁少圖日月之勞仰報乾坤之賜

又謝梓州路轉運副使表

諫省構員分宜罷黜潼江領漕誤委事權仰戴異恩俯  
流感涕伏念臣生而孤遠學則迂踈自奔走于末途常  
激昂於壯節當先帝御圖之始選在賢科及陛下繼照  
之初推居言路無裨毫髮徒歷歲時常引過以乞麾遂  
忝恩而生計始終幸會進退全存此蓋皇帝陛下運德  
同克察言如舜明有燭幽之理仁無異遠之心器使庶

工術懷羣動謂臣久塵臺省特假以使名如臣素熟土風又付之鄉部臣敢不恪遵吏檢深養治源推惠澤以濟困窮舉條教以繩偷惰庶無罪悔特報生成

謝成都府路轉運副使表

進奏院遞到告命一道伏蒙聖恩就差臣權成都府路轉運副使已於今月七日到任訖者轉輸淮甸既受命以之官庶按坤維邊叨恩而易地寵章特異感涕交流伏念臣早以踈凡誤蒙役使備員臺省預聞國論之幾

微賜對簾帷屢奉德音之獎訓一違朝綬四涉年華甘  
簿領之沉迷事道途之奔走抗章宸扆少希惻恤之私  
得請鄉邦極享便安之幸此蓋太皇太后陛下德由坤  
載道濟離明有任賢使能之心願登至治無泄通忘遠  
之意昭示大公終賜矜憐俾塵寄任况岷峨之列壤乃  
桑梓之封封入境觀風情偽同於指掌過家上蒙歲時  
得以薦誠恩實光華力難報稱臣敢不致勤夙夜積慮  
簡書有以澄清雖愧古人之志近於忘厚敢忘君子之

風庶幾涓勞仰酬化力

又謝成都府路轉運副使表

王事言私蓋犯辭難之義天心垂宥特推從欲之恩就  
畀漕符即居鄉閭深慚委任俯切兢惶伏念臣生長寒  
鄉棲遲冗路雖曰為貧而願仕曷常枉已以求容親逢  
納諫之朝屢伸狂瞽深體裕民之意久莅輸將何補涓  
塵僅逃罪戾輒露由衷之請苟希恤隱之私亟奉詔俞  
仍叨使領罷淮壖之奔走習井絡之便安自省孤根極

知幸會此蓋皇帝陛下克仁天覆湯德日新以四海為  
一家視兆民如赤子敷施大信役駁萬官付臣以故里  
之行責臣以遠方之治地產之盈虛可度物情之熾惡  
粗知郡邑相望如在戶庭之內松楸密邇每寬霜露之  
思竊祿于茲厚顏已甚臣敢不布宣惠澤申飭教條勤  
恤疲氓力繩慢吏期得富饒之實預防弛廢之端倘于  
父母之邦可安其職則報君親之賜無愧此生

辭免中書舍人表

原註元祐  
八年六月

竊以法從迴翔盛時尤貴掖垣潤色儒者共榮既代王  
言亦聞政事責任至重簡拔惟賢如臣踈愚况復衰晚  
文辭不足以發揮典制議論不足以補助簡書忽添詔  
除何堪器使願寢已行之命免貽不稱之譏所有告命  
未敢祇受

謝中書舍人表

言惟作命愧無潤色之才服以章身誤被分頒之寵便  
蕃異數震恐懦踪伏念臣世處寒鄉性非中智少而嚮

學粗知為己之方長亦效官偶適代耕之願熙寧中以  
賢科射策元祐初以言路僇員竟難補報于朝廷已分  
棲遲于郡國何期白首重瞻日月之光遂向清時輒上  
雲霄之路此蓋伏遇太皇太后陛下德由坤載道契離  
明夙夜萬事之幾思濟于治網羅一介之善俾効其長  
乘大化之生成致枯核之發育文章爾雅安能贊一代  
之輝光忠義成名敢不勵平生之操守庶幾晚節少答

洪私

又謝中書舍人表

詞禁代言乃諸生之榮遇身章被賜蓋明主之厚恩拜  
命優隆省躬愧幸伏念臣生而孤遠學則迂踈知善惡  
之異途惟務養心而自貴信通塞之有命安能枉已以  
求容進退何常險夷不易歲月耗凋于奔走之後形跡  
沮縮于憂患之餘何期雨露之私誤及桑榆之景爰從  
右蜀付以都郎既躋柱史之華遂及掖垣之職故為虛  
受寶繫親逢此蓋伏遇皇帝陛下舜治以恭湯新厥德



以發號施令為先務欲紀之以文章以因能任官為大  
公必考之以名實苟片善可收而用雖至寒不使之遺  
幸眷于茲叨塵過甚詔見王者之志其何以發揮服有  
君子之容敢忘於報稱誓堅履尚特達鈞陶

謝入伏早出表

歲有一時之暑安敢忘勞恩加三事之臣遽令退食敬  
承溫旨竊愧懦衷臣等誤以短才與聞庶政雖窮日力  
莫代天工適逢庚伏之辰得遂燕居之欲此蓋伏遇太

皇太后陛下德該洪造治格太和愠已解於薰風景自  
長於化國是致弼諧之職殊忘勤瘁之憂動復便安極  
知幸會在公之事居常早夜以深思報上之心不以炎  
涼而易輒庶幾憾髮少答生成

又謝入伏早出表

金火將交當晝分而極暑絲綸其出許夙退以少休仰  
荷恩憐俯慚悃素臣等丁辰過幸軸政寡能每惜分陰  
欲收寸效雖逢三伏之氣象敢覲一身之燕閒伏遇皇

帝陛下大智察微深仁恤物謂天道既施于炎燠則人情皆願於供安曲軫清衷特頒溫詔日方中而或息豈有疲勞時易失而可珍惟勤補報

坤成節賀表

佛果周圓罄後天之善祝主恩隆盛錫湛露之洪私禮被臣鄰慶同宇宙恭惟太皇太后陛下坤元至靜乾造曲成績保佑之深功享太平之至樂時乘慶節帝與遐齡勝因已集於清躬廣燕遂均於列辟臣等幸瞻法康

敬奉壽觴詠歌既醉之篇備陳五福稱頌無疆之算期  
至萬年

又坤成節賀表

演三乘之教覺緣潛會於慶長獻萬壽之觴禮敬極隆  
於孝治旁均燕喜下及臣工恭惟皇帝陛下克化時雍  
舜心日治東朝養志欽承母道之尊南極占星稽合壽  
祺之應凡遇祝延之列皆施命宥之恩臣等叨備近司  
親逢盛典屬饜而已莫酬鎬飲之仁敬畏待之更祝嵩

呼之福

辭免給事中表

原註元祐八年十一月


伏以命令之行貴於中理論駁之任慎於擇人或誤選  
掄將貽罪咎臣學不造道材非適時平生安流落之常  
晚歲有亨通之漸既塵侍從未報涓埃忽叨制綍之恩  
又進瑣闥之職厚顏滋甚騰口謂何雖行已直前無所  
畏避而遇事當斷多涉迂踈苟宣納之過差乃是非之  
混亂伏願追回成命妙選良臣使還詔批救之風不減

前輩則發號施令之體無累聖明臣之愚誠虔切於是

謝給事中表

潤辭西掖不能發揮典制之文遷職東臺何以報塞朝  
廷之過恩隆選重感切憂深臣植自孤根進由樸學佩  
服聖賢之訓常秉危心審知義利之途敢愆素履服勞  
雖久涉險居多偶暮境之親逢致亨衢之序涉屢塵華  
賈疊拜寵章况封駁之置官亦論思之任責豈朝衰薄  
輒與選掄此蓋伏遇皇帝陛下乾健有為離明能照攬

政機而獨斷格舉網條循治路以安行動嚴樞祝推任  
人之誠而不求其備操厲世之術而用勸其忠誤以踈  
凡處於津要臣敢不勉遵約守祇慎攸司體從政之大  
方戒近名之小智庶無瘵曠特答生成



欽定四庫全書

集部

淨德集卷七至十

詳校官庶吉士臣馬履泰

檢討臣何思鈞 履勣

總校官舉人臣章維桓

校對官臣

謄錄監生臣



欽定四庫全書

淨德集卷七

宋 呂陶 撰

表

謝知陳州到任表

臣伏奉告命差知陳州已於四月一日到任者將命出疆自貽罪戾叨恩補郡私事便安仰荷寵靈俯懷隕越伏念臣才非專對學亦寡聞比緣變故而行豈以宴私

為事昧從宜之禮茲為失職之愆合正常刑以懲顯  
咎敢期睿鑒曲庇孤根下遷書使之名尚委藩侯之寄

葉王稱東都事畧陶奉使契丹以宣仁后在殯辭契丹  
宴設西府奏陶不先取旨除集賢院學士知陳州宋史

陶傳

失載此蓋伏遇皇帝陛下離明溥照乾度廣容聽斷務  
於原情操術參於使過舜心篤孝矜其寧戚之喪克德  
尚仁議以惟輕之罪生成所暨塵冒尤深臣敢不敷暢  
教風遵承憲令勤救饑之政以綏惠流散攷治水之迹  
以防閑墊災冀集涓埃歸酬覆載

謝知河陽州到任表

臣伏奉敕命就差知河陽軍州事已於今月十日到任者出歷近旬即席未溫易地專成踈恩過厚仰承重寄俯激危心伏念臣生長遐方沉迷樸學為貧而任敢懷富貴之求度已不能安及功名之會晚蒙異域稍涉華塗祿過量而易盈位乘高而速墜既煩宥罪猶許牧民京輔奧區纔布二旬之政河津巨鎮又同千騎之行委任皆優叨塵太甚此蓋伏遇皇帝陛下文明齊日洪覆

如天恢張百度之新克光前烈役御萬官之衆俾効寸  
長故以此州付於不肖臣敢不體重民之意堅許國之  
誠共治惟良勉希漢世之循吏以公其允敬服周官之  
訓言冀贖往愆歸酬洪造

謝知潞州到任表

臣伏奉敕命差知潞州已於今月四日到任者引嫌以  
請遂沾雨露之恩受命而行敢憚道途之役即安於此  
揣分惕然伏念臣孤拙自將迂踈安用預先帝訪問之

選乃竊虛名為陛下侍從之官殊無小補俄以出疆之  
罪遽膺守土之行僅及一時已更三郡承流宣化愧職  
業之未修送故迎新幸封圻之密邇此蓋伏遇皇帝陛  
下玩心於道繼序以仁崇有國之陛下優容邇列重斯  
民之師帥遴簡賢能入而嘗近於清光出則必叨於名  
鎮因之寄任及此孤愚臣敢不推本淵源講求體要堅  
險夷之履趣殫夙夜之勤勞晉有唐風惟務順民以治  
魯非齊政安能累月而成冀收臺髮之功歸答堪輿之

賜

謝改職名表

臣準都進奏院違到敕一道伏蒙聖慈荷授臣朝散大夫充集賢殿修撰已祇受者頌恩改職猶參書殿之華拜命撫躬深愧儒林之秩伏念臣稟生寒陋涉世迂踈以章句之學竊祿於盛時以日月之勞致身于要路鸞臺鳳閣嘗塵隸屬之員熊軾虎符屢假承宣之寄未能補過安敢冒榮伏遇皇帝陛下繼序以思正名而治酌

古今之廢置載以官儀慎予奪之重輕特為國柄不遺  
衰蹇亦昇寵光臣敢不仰載洪私敬承異數循名責實  
慚非撰述之才竭節盡誠誓報施生之賜

謝知梓州到任表

臣伏奉敕命差臣知梓州軍州事臣已於今月二十六  
日到任者昔乘拜疏願分鄉郡之符今乃叨恩遂載邦  
侯之旆仰虔俞命俯激危心伏念臣習不逢原用難應  
務起家從仕希子雲之安恬發策決科鄙谷永之附會

每究觀于義利靡徇易於險夷持以自盟久而無愧半  
生零落空驚歲月之崢嶸晚景亨通忽接雲霄之步武  
偶緣使事輕去從班未閱再朞俄更四守既遂里閭之  
請又塵屏翰之居力薄豈堪恩深宜報此蓋伏遇皇帝  
陛下至仁天覆大智日躋成湯之善與人必於器使武  
王之不忘遠燭以皇明未謹衰遲尚優臨遣况臣早歲  
曾使此方導德澤于數州粗能寡過奉教條于一郡敢  
不潛心冀收皂髮之勞歸答乾坤之賜



謝責分司表

原註紹聖四年閏二月

人臣之過莫大於不忠王者之刑必誅而無赦仰賴好  
生之德俾從分務之司敬服寬恩交流感涕伏念臣稟  
生寒陋涉世艱危不知事主之大方徒感近名之小智  
出辭妄亂遇事狂迷名教之所莫容憲法之所不宥復  
何面目尚緩班聯既假職於別都仍即安于善地餘生  
甚幸化力自歸此蓋伏遇皇帝陛下加意盈成勵精聽  
斷繼志述事以光大前烈顯忠遂良以固安永圖察萬

物之殊源無容紛糾憫一夫之垂盡未即誅鋤正其罪  
以示勸懲錫之祿以養衰病臣敢不追訟前青切防後  
愆草行險之非心持保身之深戒生而無補僅逃蕭斧  
之常刑死或有知猶冀敝帷之維患

謝責降南嶽廟表

壞法容私義當顯戮謫官領局恩許自新伏省過尤良  
增戰灼伏念臣稟生寒陋涉世艱危早竊虛名晚塵臚  
仕持從臣之橐無補猷為佩郡守之符多曠職業縱細

民之盜鑄致私鏹之公行罪狀甚明刑書未議洎泰鄉  
邦之寄任數為風眩之侵陵拜疏自陳方覲退休之幸  
原情必罰俄聞責黜之音仰畏雷霆俯驚冰谷欲繼上  
歸田之請慮難逃慢令之誅即扶病以之官已具舟而  
去里窮途易塞衰氣復傷適當起纜之初幾有蓋棺之  
事遽飄流於三峽遽放蕩於重湖以七十之羸軀盡八  
千之去路備嘗險阨屢及俄虞偶全犬馬之餘生深荷  
堪輿之厚賜此蓋伏遇皇帝陛下乾行適治豐照通幽

督群吏之循公光昭先憲寬一夫之垂盡滋廣至仁未  
即銖鋤止從廢逐正其罪以警偷惰錫之祿以養衰殘  
臣敢不追訟愆違恪遵檢押雖有負薪之疾豈敢乞骸  
空懷結草之心終期報德

謝知邛州表

臣五月二十日準進奏院遞到敕一道至衡州伏蒙聖  
恩就差臣知邛州軍州兼管內勸農事臣即時祇受訖  
者賤處遐方無復全軀之望生還舊里仍四守土之榮

思出非常力同再造伏念臣稟生寒陋涉世迂踈粗聞  
修己之方竊有逢辰之幸熙寧拔士早緣制策之採收  
元祐擇官晚有禁塗之更踐乏深厚之文以丹書典誥  
寡周密之慮以出納樞機責任太隆施為奚稱方朝廷  
之攻舉嘗勵翼以赴功逮朋黨之論興亦淪昏而被譴  
天高莫訴罪大胡言羽翼傷摧尤畏鷹鷂之搏逐夢魂  
驚悸深憂斧鉞之加鋤敢期放廢之餘遽玷寵光之異  
此蓋伏遇皇帝陛下運乘天造道並日升聖繼聖以儲

休光昭大慶新又新而作德覃及群倫盡成湯解網之心廣夏禹泣辜之惠哀憐謫籍付畀郡章肉白骨以覲充盈然死灰而求炎焰生成至此報効云何臣敢不欣戴至仁推明初政承流以治少希循吏之所先擊壤以歌願與齊民而共樂庶幾晚節無累洪鈞

謝授再知梓州表

臣先以罪分司南京衡州居住於元符三年四月準告落分司差提舉成都府王局觀至五月內準敕就差知

邛州臣逐次謝恩祇受及奉表以聞去訖至今年二月  
七日到綿州羅江縣又準告充集賢殿修撰改差知梓  
州臣即時望闕謝恩拜受者九殞之餘忽逢再造一年  
之內輒易三遷初構位於嗣官旋領麾於鄉郡繼忝集  
仙之命仍分左蜀之符并出異恩悉還舊物幸非所望  
感莫能勝伏念臣學不能美身志未可適道動踰涯分  
易速悔尤奮飛於畎畝而濫陪英俊之存涉獵於縑緗  
而與聞朝廷之政謂之才則嘗踐更於臺刑加之罪則

久廢放於江湖小人持附會之心乘而下石騷客有哀  
憐之興惟欲招魂累年趨必死之鄉一旦履復生之地  
游沾殊澤增責餘齡此蓋伏遇皇帝陛下光紹寶圖勃  
興治道大判惠邪之勢深權用舍之機雖衆正在朝足  
跨商周之盛而一夫失職尚櫻克舜之心卹及衰殘槩  
從收叙臣敢不究觀否泰省念初終如痛定而反思若  
途窮而利往枕邱適願既知於瞑目之前結草酬恩敢  
憚於沒身之後



謝知梓州到任表

臣近準告命伏蒙聖恩除臣依前朝請大夫充集賢殿  
修撰知梓州軍州事已於三月十七日到任訖臣聞能  
官人者克之盛德欲惠養於生民再為郡者漢之名卿  
頗光輝於前世蓋知而善任任則必能舉其職故去而復至  
至則有以慰其思乃君臣上下之交亦古今賢聖之美  
載之行事可得而聞魏相之於河南以方嚴成治行黃  
霸之在潁上以寬明得衆心盜賊未平願借寇恂之力

兒童相戲喜聞郭伋之來或體國以致忠或宜民而立  
政前功不替後效愈明近代以來斯人蓋寡未敢有起  
於廢成賁以寵光復從書殿之賢仍領鄉邦之寄苟踰  
其量徒厚爾顏伏念臣學文不能信道未篤丁辰於始  
衰之日誤涉華途被罪於垂老之年久棲裔土忽逢聖  
作偶得生還特出淵衷悉叨舊物况潼川之區域乃益  
部之比鄰嘗綰郡章尚傳里誦江山如故得陪父老之  
嬉遊坵壟不遐庶盡歲時之孝敬此蓋伏遇皇帝陛下

鼎新大政萃聚衆材用人如日之照臨正邪自辨成物  
若天之化育小大不遺所以甄收及於衰朽臣敢不持  
循素節勉強暮齡廣上德之寬仁卹遠方之凋瘵處耕  
田鑿井之衆不失常生在垂衣拱手之朝庶幾小補

乞致仕表

臣生長遠方逢值聖世擢皇祐進士登第寧制舉元祐  
中塵冒侍從紹聖初謫放江湖伏遇皇帝陛下光紹寶  
圖誕敷鴻澤昭洗過惡叙復班聯臣深遇勉竭疲駑仰

答造化而齒髮衰暮疾恙侵凌竊慮職事曠廢重取非  
疾伏望聖慈念臣今已七十四歲舊感瘴癘間或病作  
心力昏耗難以釐務伏乞特降指揮許臣守本官致仕  
庶幾安養羸疾遂其餘生

謝致仕表

齒髮衰殘義當告老絲綸煥赫恩許歸休荷君父之始  
終全臣子之進退敬承俞命感激危心伏念臣起迹至  
寒逢辰過幸早竭簿書之力徒自沉迷晚叨侍從之班

訖無補報侵尋暮境眷戀故鄉輒申謝事之誠覬遂乞  
骸之願仰煩睿鑒俯察愚衷此蓋伏遇皇帝陛下舜道  
用中克仁濟衆如天地陰陽之覆不間于微雖蟲魚草  
木之生亦從其欲因而衰朽得遂休閒臣即解郡章言  
旋故里想天顏之睟穆難睹清光詠化日之舒長敢忘  
帝力

淨德集卷七

欽定四庫全書

淨德集卷八

宋 呂陶 撰

內外制

誠厲諸路監司修舉職事詔

朕思古之人君恭己無為而恩之所加者深威之所制者遠群黎百姓莫不悅懷畏服而無一夫不獲者其道非他盖有法度以為治世之具張官置吏奉而行之足

以整齊天下而導其德澤以及于遠近幽深故也今四海之廣判為諸部部有使者以督察郡縣乃為朕行法度而導德澤者比歲以來或不勝職以苟且為易簡以解縱為寬裕以懲奸去惡為慘暴以度用均財為刻剝政有先務則置而不問事有中道則違而不循是以賦役不均刑罰不中盜賊不戢疾苦不除其勢駸駸然日趨于偷惰弛廢之餘而不知止朕何望焉元元何賴焉朕夙興夜寐講求治要論議所先詔令數下率從寬厚



者蓋欲安養生民而躋之富壽爾非謂使汝一切廢事而竊祿構位也詩不云乎彼其之子不稱其服書曰敬爾有官亂爾有政斯皆士大夫之所習聞也爾其勵志意修職業持準繩以肅庶務推仁惠以蘓疲民使四方無咎咨憔悴之嘆而朝廷享太平之福豈不美歟苟蹈前愆必罰無赦

吏部郎中制

敕文昌六官分董天下之務而吏部最號要劇蓋萬官

之衆流品有清濁資格有先後法不歸一吏能為奸夫  
欲銓綜至當而選授之路不失于紛縟則小宰之任安  
可虛授其人哉以爾具官某學而從政志尚不苟更涉  
中外風迹可稱擢其規鑒之明處以銓衡之貳昔韋陟  
以殿整稱職孝本以清慎服人勉蹈前修無忝朕命

禮部郎中除吏部員外郎制

敕吏員多而待次者衆條目混淆而吏昏得以因緣為  
姦此選部之公患也故特擇清尚通識之士以助長貳

庶幾銓綜有序而物論平允爾端亮不倚敏於從政出  
將使指入踐省曹皆有能名效於已試天官之屬宜以  
才任惟公可以循守法式則吏不能欺惟明可以甄別  
流品則士皆無憾往惟懋哉以稱朕命

吏部侍郎除戶部尚書制

敕中臺之建六卿異職別流品精選拔使人材無遺者  
天官之事均財用審出納使民力不匱者司徒之責皆  
朝廷之重寄士大夫行己及物之地也由彼遷此莫非

能臣以爾具官某博識多聞明於世務資忠履信蔚為  
吏師頃從四戶之華總泣三銓之務嚴整稱職如韋陟  
之賢清慎服人有孝本之譽推其餘蘊可畀重權宜邦  
計之總司庶賢猷之兼濟予有量入為出之法爾其慎  
詔於他求予有損上益下之心爾其深思於邦本勉從  
明訓永底茂庸

資政殿學士通議大夫知成德軍李清臣可戶部  
尚書制

敕周之制以九賦九貢歛財致用而以九式均節之入  
有藝極出有度數是以民不告勞而經費無不足此王  
道之資也今天下大計歸要地官凡盈虛登耗之差高  
下輕重之勢必審處而後行其任可謂難矣然特有司  
之事爾朕擇輔政之舊臣而付之愛民保國之意可見  
於斯具官某讀聖賢之書而學通今古辨義利之分而  
行有本末早蒙先帝之遇久踐禁近之榮謀於廟堂得  
持網操轄之體任以蕃屏見承流宣化之勞宜國計之

總司庶賢猷之兼濟予有量入為出之法爾其慎詔於他求予有損上益下之心爾其深思於邦本惟敷餘蘊以底茂功

寶文閣待制權知開封府韓宗道可戶部侍郎制  
敕左右侍從之臣朕待之無間也外則王畿之政以綏  
又萬衆內則文昌之貳以總領庶務寄任皆重要之得  
人具官某才資博通志尚中正忠良之訓能世其家愷  
悌之心克施有政滋猷為之美久安禁近之聯天邑

之繁既踰年而成政地官之副宜分任以責能况此要途蓋為舊物爾具體解用裕民之至意量入為出之規勉續前功輔成大計

除戶部侍郎制

救周之制以九賦九貢斂財致用而以九式均節之入有極藝出有度數是以民不告勞而經費無不足此王道之資也今天下大計歸於地官凡盈耗登耗之差損益重輕之理必審處而後行則建正立貳可不慎哉具

官某忠正出於天資彊明通於世務多藝故能從政知義可以理財故命以小司徒之職俾任其事爾其體節用裕民之意謹量入為出之法輔成大計以稱朕心

兵部侍郎除禮部尚書制

敕小司馬典五兵之政所以申講國威大宗伯掌三禮之務所以翊成邦化眷惟職任率賴俊良某粹積於中壯行其學式敷遠業久序禁途以周之九伐治兵有嚴我武以隋之四曹授政無瘵厥官爰取用於賢猷俾進



司於國憲夫聲明文物之盛乃風俗教化之原予欲考  
三代之情文爾其崇本而抑末予欲備一朝之制作必  
也引古而驗今勉勵寅清以勤職業

給事中除禮部侍郎制

敕東臺之制以駁正為任所以慎命令而維紀綱秩宗  
之貳以禮樂為職所以和邦國而厚風化皆朝廷之高  
選士大夫得志行己之地為官擇人豈虛授乎以爾具  
官某學該本原行著坊表在侍從之列每善於論思凡

政事之行能檢其違失更踐寢久譽望益隆循名考實  
故命爾以小宗伯之事夫典章度數因革有不同述作  
情文議論莫能一惟考古驗今以求損益之當惟體常  
盡變以備制作之功庶幾文物聲明之盛炳然同於三  
代則儒者能事蓋無愧矣

端明殿學士知永興軍鄧温伯可兵部尚書制瘵  
救中臺之建六卿異職惟大司馬綜五兵之要蓋申嚴  
威制而鎮重國體也擇人以任安可易哉具官某學該

本原行有坊表夙敷遠業久序要途入則制司命於禁  
中極為儒者之榮遇出則頒教條於闡外雅有循吏之  
休風其還方伯之符歸領夏官之秩蓋推久次必允公  
僉爾其以周之九伐訓戎有嚴我武以隋之四曹治事  
無瘵厥官行乃夙聞副予慎選

著作佐郎時彥可集賢校理兵部郎中制

敕具官某古之人學而仕也其心豈有所苟哉博聞強  
識則發之以文章陳力就列則著之於事業朝廷所以

養材任官之術亦本於此是以賢者在位能者在職而天下之務巨細畢舉焉以爾儒林之秀蘊積深厚試藝於廷名在第一登踐秘館亦顯厥聞集賢之華遷汝以職司馬之屬付汝以事郎選清矣勉而莅之庶幾於文於政兼能而兩得豈不偉歟

除刑部郎中制

救法者公天下之具也而有司用之輕重或出其意豈欽恤明慎之謂哉以爾忠恕之資善燭厥理故命以秋

官之屬傳不云乎刑者成也一成而不可變是以君子  
盡心焉爾能求為君子則庶幾當罪而無寃民矣

左朝請郎喻陟可刑部郎中制

敕具官某法者公天下之具有司用之重輕上下或出  
其意豈欽明慎之謂哉朕憂憫元元之不辜而慎重聽  
聽訟斷獄之職盖以此也以爾疏通之才善燭厥理刺  
察之政頗宜於民惟導宣德澤而有惠養之功惟循守  
憲度而無弛廢之患秋官之屬用旌其能傳不云乎刑

者成也一成而不可變惟勉之哉庶幾刑不濫為君子  
矣惟勉之哉庶幾刑不濫而民不寃則汝之職業舉矣

秘書省校書郎陳師錫可集賢校理工部郎中制  
敕具官某朝廷設文館以養天下之士俊觀其成材而  
用之是故郎臺之選往往由此而出則待之之意可謂  
厚矣以爾多聞博識守以端莊發為辭章擢在異等言  
路之獻告冊府之細繹率有聲聞推於搢紳書殿之職  
起部之官考于公僉肆以命爾所以待之者固厚矣則

報之安可薄哉其勉猷為以稱褒任

中書舍人遷給事中制

敕朝廷之政歸於臺閣而黃門給事總領論駁蓋樞機  
周密防過舉而從至當也擇人以任允屬俊良具官某  
操履之修求合道義更踐之久推高措紳潤辭為詔命  
之光端議乃政事之益宜自西掖遷之瑣闥茲用所長  
固非虛授夫代言敷訓之體既有得於文華則封制還  
敕之能必將見於事業汝惟懋哉

秘閣校理試秘書少監王古可起居郎制

敕具官某朝廷之用人雖以行實才能為本其遷進之序則途轍各異蓋甄別流品而慎重名器也是故祖宗以來二史之職或以科舉之高第或以儒館之久次或學術推于一時或更踐由於要地然後擢而任之國有舊章朕不敢易以爾名臣之後力學自進出將使指入造省闡秘閣之校文卿寺之副貳率有顯譽久而益彰是用輟從麟閣之遊處以螭坳之位夫能直筆以記傳



為信書使朕無過舉而爾得良吏之體則善矣

秘書丞呂希純可起居舍人制

敕具官某先王之設官慎之至矣大則凝丞輔弼必得  
正人小則攜僕庶府其惟吉士蓋左右前後皆當其位  
則出入起居罔有不欽而况立於殿陛以記言動則授  
受之際可非其人乎以爾德義之訓克承厥家文史之  
學自進以道儒林推其強博禮官服其辯論一代之典  
既有撰述之勞右史之華是為褒擢之漸夫端良之士

日侍朕側則庶乎無過舉而有常德責任之意豈特執筆以記哉益勉猷為以副眷待

起居郎姚勔可中書舍人仍賜紫金魚袋制

敕二帝三王之制坦明推與邈乎不可復也漢之訓辭號為深厚亦足嘉焉有唐之盛間得名儒典司詔誥如蘓李常揚賈許革皆以大手筆相高一時至於發明人主之意該切事物之情形於筆端感動天下則陸贄無以加而封敕亦有得焉我思古人極慎茲選考以清議

咨於老成以爾具官某性質之美學問之富積于中然後發于外知所重故能有所輕早懷祿仕之情中有山林之興起而復用尤見其實伏蒲以力諫執筆而直書俾代予言必稱其任夫辭以體要為尚庶幾助風化之純官以侍從為稱不可忘論思之益敬服朕命往惟懋哉

監察御史來之邵可殿中侍御史制

敕具官某御史以辨邪正維持法度為稱制朝廷以別

能否進退群吏為至公二者相濟而上下兩得則天下之事何患不治以爾端良之資無所避就言而可行有補于政稍遷以位示旌勸也古之人有歷五院者前史載以為美而後世推以為賢汝惟勉哉以期終譽

除殿中侍御史制

敕朕嗣位以來開廣言路招致端良之士聽受讜直之言八年於茲忠益多矣慎重其職敢虛授乎比者御史員闕近臣謂爾操立中立宣任茲選朕信其言而命焉

其審辨邪正指陳得失使朕又信爾言而濟乎治豈不  
美歟

尚書吏部郎中莊公岳可鴻臚少卿制

敕具官某朕推至誠以待大臣安問其小嫌哉然大臣  
之事朕則不敢以不嫌為說蓋為朕守法度而示天下  
以至公也夫為大臣而守法度示至公則朝廷之事當  
無不治矣遠嫌有請可不從歟以爾良於治躬敏於應  
務刺察之寄屢試四方銓綜之司亦惟久次屬命相之

始以避親為嫌參考故常重違誠懇其易臺郎之任往  
從卿寺之游歆服寵嘉勉修職業

皇叔太子右內率府副率叔釗可特授太子右監  
門率府率制

敕具官某朕於宗室不敢以恩廢法凡遷進之序必付  
之有司而後行所以示至公而防虛授也以爾居寵能  
戒為善而樂考其歲月之久察其行誼之常當懋以官  
用勵於衆益思祇慎乃稱寵光

龍圖閣待制權戶部尚書錢勰可龍圖閣直學士  
權知開封府制

敕夫王畿千里萬衆之所聚而豪宗大姓以權利相市  
儉民黠吏以巧詐相高獄訟繁興奸宄竊發政非其人  
則四方無所法治待其術則朝廷賴以尊必任老成庶  
諧公議具官某富通儒之學而輔以強敏明當世之務  
而審於辨裁文陛之游每竭忠而慮國地官之職常重  
本以厚生尚賴賢猷慎司民政是用因河圖之舊職進

以美名付天邑之要權續其往效若夫施廣漢之鈞距以屏息攘盜用延篤之寬仁以綏安善良皆汝舊聞何煩多訓服我殊命底於茂庸

除節度制

敕治兵者天下之至權故列貔貅之士以備宿衛命帥者朝廷之大事故有斧鉞之賜以示威靈眷內外之所毗惟忠勲之克稱爰申渙命昭諭群工具官某推竒正之學以臨戎持果毅之氣以報國建靈旗而敵愾報克



捷之勞提甲士以環宮畏肅清之令予欲嚴六師之政  
必先申命於勁臣予欲同四國之藩莫若正名於方伯  
武舉武安之邦用褒兵要之勲益以爰田衍其真賦允  
矣寵光之盛壯哉形勢之強於戲軍如羽林蓋象天之  
壁壘國有祈父實為王之爪牙惟威愛適中則士心服  
惟機權應務則邦體重益堅壯節以副茂庸

侍從乞郡制

敕左右侍從之臣立朝既久知朕愛養元元之意願得

郡以自試者蓋有志於民也宣示寵敷用光其行具官  
某學知大方行有素守以譽望之顯歷高位以文藻之  
懿踐禁垣方資潤色之才亦佇論思之益遽形奏牘懇  
請州麾宜陞延閣之華往莅丹陽之衆夫古之循吏蓋  
有君子之風儒者在位則能美俗苟以文雅緣節使政  
平訟理而斯民安其業得非朝廷之美歟

西京左藏庫使榮州刺史帶御器械朱伯材可特

授文思使依舊榮州刺史帶御器械制

敕具官某朕郊見天地蒙神祇之休敷為煥渥均被四海愛自親始恩典尤殊故外戚之家有以慶澤陞進者乃法所當與非朝廷之私授也爾於太后之親實為近屬擢遷使秩蓋協彞章其服寵光益思報效

皇城使帶御器械向綽可遙郡刺史制

敕具官某朝廷設懋官之法以待羣吏之進重輕高下曲折必當有至公而無虛授所以嚴沮勸也以爾忠勲之家早易武弁更練庶事恪勤累年歷職於茲城滿歲

則有賞執兵於殿陛解秩則當遷酬此勞能之殊擢以  
刺察之重益圖報效無忝寵光

得功人蕃官六宅使李宗誠制

敕具官某古者軍賞不踰時故傳有舍爵策勲之禮蓋  
以褒寵功功感勵事氣於事不可緩也爾為朕捍邊能  
奮勇力鋒鏑之下執俘以獻遷官一等庸報厥功往服  
恩休益圖報效

淨德集卷八

欽定四庫全書

淨德集卷九

宋 呂陶 撰

內外制

資政殿大學士太子少傅致仕韓維可太子少師  
致仕制

歎左右輔弼之臣謝事而歸久矣間者以相祀起之則  
以老不至朕懷思儀刑而未嘗忘也今其世嗣乃援郊

需之令有請於朝而欲加命焉亦可以致予貴老之意而成汝報親之心矣具官某父某重德偉望著在累朝忠言嘉謨有補大政知止去位積年于茲退靜之風聳聞中外宜乘禋享之祐進陟官師之聯惟爾克承顯家繼有高爵至于休居之後復享封叙之榮里閭增光搢紳所仰在君臣之分尤見始終于父子之間可明義訓其膺寵渙以介壽康

虎翼左第二軍第一指揮軍都指揮使成州刺史

賈真可右領軍衛將軍致仕制

敕具官某少壯而責以力老疾則休其身始終之際恩禮存焉爾奮自行伍遷至戎校軍中之事固嘗任責今其老矣以疾求去國有常典朕不汝遺其墮雜衛之職以為退居之寵

權泉州惠安縣尉王仇父景年可右承務郎致仕制

敕具官某父某朕既郊而赦雖一命之吏其親高年則

許以名聞而褒寵之亦先王貴老之義歟爾生于盛時  
享有上壽祿食之養已遂佚安官封之榮宜示旌勸非  
特慰爾子孫之情亦可以助風化于天下也

新授蘇州司戶參軍王浩父允恭可假承務郎致  
仕制

敕具官某父某年之貴于天下久矣三王四代未嘗遺  
也況孝治之世而敢薄其禮乎郊赦之令所以推封叙  
之恩及于一命之吏得以褒其親之耄者意本于此惟



爾克稱宜服寵休

皇叔故右武衛大將軍禁州團練使仲雪可贈徐  
州觀察使追封彭城侯制

敷朝廷之于族屬始終之際恩禮可謂至矣生則高爵  
重祿以處之以示敦睦之教沒則隆名異數以贈之以  
致哀榮之情國有舊章朕不敢廢以爾具官某少蒙祖  
宗之澤長親師傅之賢禮敬以自文富貴而能守降年  
不永朕甚傷之命以廣車進之侯爵茲為五等之貴以

慰重泉之思幽窆有知尚歆寵賁

皇族郊恩封贈制

敕祖宗之于族屬始終之際恩禮亦至矣生則高爵厚祿以處之以示敦睦之教沒則隆名異數以贈之以致哀榮之情國有舊章朕不敢廢其官某慎靜而保富貴修飾而蹈禮義宗族仰其訓範子孫蒙其寵休五福考終既全洪範之錫九命作伯宜享上公之封服我恩光以賁窆窆

三司使父某加贈制

敕朕嚴郊廟之享格神祇之休推朝廷報本之心慰人子顯親之志褒榮有典存沒率同具官某故父某學焉醇儒仕至高爵經術自信士林所宗昔在仁祖之朝嘗預通英之選淪謝雖久風徽若存位次三公已膺卹典階崇一品載錫籠章冥漠有知光歆光賁

龍圖閣直學士中散大夫陳安石故父任尚書刑部郎中直昭文館贈司徒貫可贈太尉制

敕朕答天地之休嚴郊丘之享順受景福敷為渙恩推  
布德行惠之心達于遐邇陰顯親追遠之制不間幽明  
況處從官之崇宜褒先閔之驗具官某故父某履有吉  
德富于多文被遇祖宗之朝更直圖書之府詩禮之訓  
見于義方閑閑之高彰厥善報宜追榮于公爵以昭賁  
于家祠冥漠有知尚能歆服

陳安石故母蔡國太夫人李氏可贈魏國太夫人

制

教古之人其母賢則其子有立於時其令名懿德可見于後世此報親之恩所以加於存沒而廣孝之教成于天下也具官某故母某氏生有淑行宜于顯家萬鍾之養雖不及于承顏大國之封亦足彰其流慶庶幾幽窆享此寵章

陳安石故妻太原郡君王氏可贈京兆郡君制

教三年而郊受釐于神祇嘉與海內共焉是以行慶施惠及于庶工又從而廣之以及于伉儷之親不問存沒

咸有褒賁幽明之際可無憾矣具官某故妻某氏率履婦德作配良士雍睦之教嘗推美於令門湯沐之封宜追榮於大郡詔於幽寢尚或歆承

陳安石妻安康郡君王氏可封普安郡君制

敷既郊而敷均神明之休及于天下凡造朝之士皆得褒其室家而況侍從之貴乎具官某妻某氏柔順慈愛能循法度作配君子時惟適臣迹其內助之功榮以進封之澤祇服寵命以勸閨門

右通直郎掌世康弟左朝請郎世衡故父任尚書  
工部侍郎致仕贈開府儀同三司禹錫可贈司徒

制

敕朕荷二儀之休度三歲之報丕承靈貺渙發湛恩既  
均受嘏之祥及于列位又錫漏泉之澤褒乃先猷具官  
某故父某以博識多聞見推學者以純德懿行仕至適  
臣雖淪謝歷年而風徽如在宜進他卿之貴庶為家廟  
之光幽窆有知其歆服命

右朝散郎馬玕弟左朝奉郎珫故父通議大夫充  
天章閣待制特進仲甫可贈司空制

敕荷二儀之休講三歲之祀著誠以致其報受祉而不  
敢私推布德行惠之心溥周萬宇廣奉先追遠之致咸  
暨九泉而況任從之賢嘗任祖宗之世風徽未遠褒卹  
敢忘具官某故父某才猷博通事業著見夙有通臣之  
望久登延閣之華雖淪謝歷年而聲光如在宜進冬官  
之秩式旌賢範之良泉壤雖幽尚期敬服



馬玕等故前母齊安郡太夫人鍾離氏可贈榮國  
太夫人制

敕具官某故前母鍾離氏榮則受福期中外之率同孝  
以顯親故幽明之不間申予褒卹之命慰爾劬勞之思  
以爾來歸令門率履柔德治家以禮協齊明之大端有  
子立朝表善慶之顯效其選上郡之號遂正大邦之封  
幽宓有知尚歆寵賁

馬玕等故母樂平郡太夫人楊氏可贈崇國太夫

人制

敕具官某故母楊氏推天澤以及下朝廷之至仁極孝  
思以顯親人子之能事宜舉追祭之典以報顧復之恩  
以爾系自令門嬪于吉士志專以靜著為閭德之良德  
積而深衍乃世嗣之慶告于家廟進以國封尚期光靈  
服此旌賁

馬珩等故繼母安康郡太夫人楊氏可贈康國太  
夫人制

教其官某故繼母楊氏生則養之以禮沒則顯之以思  
人子欲報其親朝廷推而為教此郊祀慶成所以講褒  
贈之典也以爾勤勞雍睦率履婦道柔順慈愛克全母  
德會乘禋享之祐宜錫追榮之休進以大封自郡而國  
幽靈不昧尚或歆承

右朝散郎行司農寺主簿韓祗祖弟左朝散郎行  
都水監主簿祗德故父任正議大夫致仕贈右光  
祿大夫璿可贈右銀青光祿大夫制

敕朕答上帝之貺嚴圉丘之禋順受繁禧敷為大號推  
布德行惠之意達于邇遐隆顯親追遠之恩不間幽顯  
沉惟侍從之貴嘗任祖宗之朝當厚褒崇以旌懿美具  
官某故父某志尚敦篤才猷敏彊雅有循吏之風久踐  
邇臣之列詩禮之訓見於義方閑閑之高彰厥善報宜  
加章綬之秩以慰烝嘗之思期爾光靈歆茲寵賁

右朝奉郎楊良顯故父任翰林侍講學士兼給事  
中贈右銀青光祿大夫安國可贈左銀青光祿大

夫制

敕朕禋奉上穹祀嚴清廟著誠以致其報受祉而不敢私推布德行惠之心溥周萬宇廣奉先追遠之致咸暨九泉而況侍從之臣嘗任祖宗之世永惟懿美當厚追榮具官某故父某學能通經行不違道以儒術自奮為士林所推親逢仁廟之好文嘗預邇英之勸講閱世未久遺風可懷宜敷錫于靈休遂進陞于貴秩非特徇乃予之請可報義方抑亦示我朝之仁不忘舊德詔于幽

寢其尚歆承

楊良顯故嫡母中山縣君王氏可贈泰寧郡太夫

入制

敕朕奉三歲之郊膺百順之貺慶及中外所以均受嘏  
之休澤該幽明所以廣顯親之教況于鞠育之報必厚  
追崇之思具官某故嫡母某氏生鍾慈柔躬履法度婦  
德之懿施于顯家慶源之長衍至後裔其新陽邑之賜  
式正郡封之名魂而有知服我休命

楊良顯故繼母太原郡太君王氏可贈太原郡太夫人制

救推天澤以及物朝廷之至仁極孝思以顯親人子之能事適乘禋享之祜率有追榮之光宜爾寵章隆于慈訓具官某故繼母某氏生蘊令德來嬪顯家均愛子之慈心勤教忠之懿範慶流于後思報厥躬特因大郡之封遂正小君之號尚期幽壤歆此殊休

右通直郎楊元永故父任給事中充天章閣待制

佐可贈右正議大夫制

敕朕荷二儀之眷度三歲之郊仰承靈休渙發大號既均受嘏之福及爾庶工又錫滂泉之恩旌其先閭具官某故父某志慮彊立才猷博通昔在仁祖之朝嘗登從臣之列屢試以事所至見稱雖淪謝歷年而風徽如在會精禋之終禮宜贈典之為先進以祿階式褒賢業庶幾泉壤尚服寵休

楊元永故母高陽郡君張氏可贈譙郡太君制



敕祭則受福期中外之率同孝以顯親故幽明之不間  
申予褒卹之命慰爾劬勞之思具官某故母某氏來歸  
令門常履柔德治家以禮念風徽之若存有子立朝知  
善慶之獲報宜隆贈典進易郡封幽宥有知尚歆寵賁

左通直郎邵聞禮弟右通直郎敦詩弟右奉議郎  
約史故父任龍圖閣學士尚書右司郎中贈通議  
大夫必可贈左正議大夫制

敕始皇祐至治之際名臣接武儒館詞禁先輝一時世

變風移朕常念之不已今其嗣子有以厥考之懿請命于朝欲從郊社而褒顯之況有故常安可忘也具官某故父某以學術自奮為士林所宗被遇祖宗之朝推高侍從之列淪謝雖久聲猷若存宜均神貺之休增踐祿階之貴非特慰後嗣之追遠光于而家抑亦見本朝之多賢盛哉往日詔于幽窆歆此寵章

卹聞禮等故母通義郡太君蔣氏贈永寧郡太君

制

敕具官某故母某氏生則養之以禮沒則顯之以恩人子欲報其親朝廷推而成教此郊祀慶成所以講褒贈之典也以爾生名臣之家為吉士之配母道之懿著于德門慶源之深衍至世嗣其新湯邑之賜進易郡封之名泉壤雖幽尚歆寵賁

邵聞禮等故繼母和義郡太君蔡氏可贈遂寧郡太君制

敕具官某故繼母某氏均帝祉以及下朝廷之至仁極

孝思以顯親人子之能事宜舉褒榮之典以報顧復之恩以爾生鍾愛慈躬履法度齊家以禮仰風徽之若存有子立朝知善慶之獲助告于家廟易以郡封幽壤有知其故寵賁

右朝散大夫充集賢院學士李周故父贈通議大夫齊可贈右正議大夫制

敕朕答天地之貺嚴郊丘之禋順受繁禧敷宣渙號推布德行惠之意邇遐率均隆顯親追遠之恩幽明咸暨

況處從官之列宜報先閥之賢具官某故父某潛德在躬治家有範詩禮之訓見于義方閑閑之高彰厥善報乃有良子進為通臣特頒贈典之優昭示祿階之貴告于家廟歆此寵章

李周故前母仙遊縣太君周氏可贈安定郡太君

制

教古之人其母賢則子有立于時其令名懿德可見于後世此顯親之恩所以加于存沒而廣孝之教成于天

下也具官某故前母某氏婦道惟恪母儀可宗旨甘之  
養雖不及于承顏侍從之榮亦足彰其流慶會郊祠之  
均福宜郡望之進封泉壤有知其歆寵賁

李周故前母仙源縣太君党氏可贈馮翊郡太君

制

教報本莫重于郊故祭有順助之福顯親無大于孝故  
沒有追榮之恩肆均錫于靈休庶推褒于慈範具官某  
故親母某氏婦德柔懿母儀恭莊以禮事夫既睦于閨

門之內以善教子遂至于侍從之途其陞湯沐之封以  
為泉壤之賁

李周故繼母仙居縣太君姚氏可贈襄陽郡太君

制

敕神錫以福惟四海之與同母主于慈雖九泉而必報  
予方致祀以均慶爾可承休而顯親具官某故繼母某  
氏來嬪德門率履婦道乃有良子進為近臣推積累之  
源流不忘聞德正追榮之名分式慰孝思魂兮有歆知

此休命

李周故繼母壽安縣太君劉氏可贈彭城郡太君

制

敷嚴吉土之禋所以同天下之禮滯漏泉之澤所以慰人子之心懿範可懷寵章惟渥具官某故繼母某氏履德柔靜宜家顯榮教誨見于母儀光輝鍾于世嗣雖慈闈之養每深切于孝思而佳郡之封尚缺承于恩制

李周故妻党氏可贈直寧縣郡故妻詹氏可贈永



寧縣君故妻郭氏可贈真定縣君制

敕三年而郊受釐于神祇嘉與海內共焉是以布慶施  
惠及于庶工又從而廣之以及其父母伉儷之親不間  
存沒率有褒賁幽明之際可無憾矣仁至義盡乃見于  
斯況侍從之賢早得室家之助淪謝茲久其可忘之具  
官某故妻某氏等恭儉慈愛能守法度作配君子為時  
適臣迹其內助之功榮以進封之澤庶幾冥漠享此追

崇

皇叔祖感德軍節度使宗景故母襄陽郡太君張氏可特贈泰寧郡太夫人制

敕人子之報其親蓋無窮已也生則事之以禮沒則顯之以恩朝廷推本其情而為之節文故郊祀大需褒榮有典幽明共之仁至義盡見于斯矣況惟屬籍之長永懷慈教之恩及舉舊章式旌往懿具官某故母某氏婦德惟順母儀可尊篤生世嗣之賢久處宗藩之理雖萬鍾之養莫能伸敬于晨昏而一郡之封尚可致隆于名

號庶幾冥識歆此殊休

宮正王氏可贈郡夫人制

敕某氏六宮之職在朕左右生有懿淑之行沒有哀榮之恩眷言始終不可忘也以爾名族之英掖廷之舊動循女則善輔陰教彤管有煒猶若風徽之存象服是宜式隆褒賁之典詔于冥漠歆此寵光

左朝散郎充龍圖閣待制王震故母金華縣太君張氏可贈汝南郡太夫人制

救古之人其母賢則其子有立于時其令名懿德因而  
見于後世此顯親之恩所以同于存沒而廣孝之教成  
于天下也具官某故母某氏柔順慈愛孀于甲族治家  
以禮著為閨門之法教子以善至于侍從之途遺懿如  
存榮養莫及會均嚴享之祜用遷大郡之封幽窆有知  
尚歆寵命

皇叔右武衛大將軍德州刺史叔昉等所生母朱  
氏可贈崇仁縣太君制

敕具官某故所生母某氏既郊而赦均神祇之休周于天下凡造朝之士皆得褒榮其親涌泉之澤下及幽壤沉屬籍之近欲報劬勞之恩卹典有常不可後也以爾柔嘉之德著在閨闈篤生良子貴處宗藩高堂之養雖不及于承顏湯邑之封尚可明于追遠光靈不泯庶幾歆承

右班殿直王志母安氏可封長縣太君制

敕具官某母某氏仕而通籍于朝則父母有封叙之別

乃故事爾舍是則惟尚年之為貴蓋本先王貴老之義推而行之所以廣孝愛而厚風俗也郊赦所載爾克稱之宜新湯邑之封以旌眉壽之福

三班借職盧拱母汲氏可封永安縣太君制

敕具官某母某氏父母已老而子未立朝則封叔之恩不可得此人情之所不足也苟能推本其情而與其不可得者則所不足遂有餘矣亦先王忠厚之政乎朕既禋而赦凡一命之吏其親及髦則許以名聞而旌寵之

蓋本情貴老之義可以廣孝愛而勸風俗也惟爾克稱其服恩光

左班殿直葛世良母郭氏可封長安縣太君制

敕具官某母某氏仕而通籍于朝則父母有封叙之別乃故事也舍是則惟高年之為貴故雖一命之吏其親耄矣而褒寵亦及焉此三代上齒之義推而行之可以厚風化而勸孝悌也郊赦所載爾實稱之宜疏湯沐之恩以榮子孫之養

宣義郎致仕孫向母張氏可封長壽縣太君制

敷具官某母某氏朕既郊而赦推本先王貴老之義凡一命之吏其親耄矣則以名聞而旌寵之所以勸天下之孝而厚風俗也惟爾高年克稱褒顯其親湯沐之封以榮子孫之養

左班殿直袁務成母趙氏可特封長壽縣太君制  
敷具官某母某氏朕若稽先王之治道務以孝敬為先凡人子之欲尊崇父母者皆徇從其情而與之是故既



郊而赦雖非造廷之士而其親老矣亦有以旌寵焉庶  
幾風勸吾俗而躋之禮義歟惟爾高年乃朕所貴其新  
湯沐之賜以榮子孫之養

尚書右僕射兼中書侍郎范純仁妻燕國夫人王  
氏可封魏國夫人制

敕大臣之體國外則以忠良之業成其名賢婦之正家  
內則以柔靜之志為之助予方任弼諧之舊以濟乎治  
爾則有輔佐之力同享其安爰霑寵章式旌懿範具官

某妻某氏生于卿相之族而動循女則歸于忠賢之家而率履婦道其退而成約則有勤瘁相成之心其進而居顯則有恭儉自警之德具此茂美是宜褒嘉顧予全魏之名邦乃爾先臣之舊里遂頒明命特啓大封豈止為室家之榮光輝于中饋抑亦見君臣之分眷厚于老成

皇叔興州防禦使仲僕妻崇仁縣君張氏可封長

樂郡君制

敕朕肇禋于郊蒙神祇之休嘉與海內共焉故推而廣之及于羣臣凡我造庭之士皆得以褒榮其伉儷而況宗屬之貴乎以爾柔嘉之德能履法度雍睦之教著在閨門宜選上郡之封俾正小君之號服此殊命光于而家

皇兄右千牛衛將軍士盍等妻高氏等可封永康縣君等制

敕朝廷之于宗屬異之以禮而隆之以恩異之不為過

制隆之不為私親蓋所以廣睦族之教也是以朕之誕辰得推慶惠以褒寵其室家爾等少循女則長率婦道靜專以處莊順不懈其新湯沐之賜式示宮闈之光

皇叔右千牛衛將軍仲微新婦陳氏可封壽安縣君制

敕具官某妻某氏圓丘之祀禮成而福隆鈞而錫之中外凡造朝之士皆得以褒榮其室家而沉屬籍之親乎以爾令淑之行嬪于宗藩輔佐有常既茂閨門之則寵

光以勸宜新脂澤之封敬服恩章益循婦道

淨德集卷九